

**Kalaallit Nunaanni ikiaroorartumik aanngajaarniutinillu pinerluttoqartarnera akiorniarlugu annertusisamik iliuuseqarnissaq, nunatsinni politiit amerlineqarnissaat aammalu suliassaqarfimmut tassunga amerlanerusunik aningaasaliisoqarnissaq anguniarlugu Naalakkarsuisut Naalagaaffiup oqartussaasuinut saaffiginneqqullugit peqquneqarnissaannik Inatsisartut aalajangiiffigisassaattut siunnersuut.**

(Inatsisartuni ilaasortaq Erik Jensen, Siumut)

### **Akissuteqaat**

(Isumaginninnermut, Ilaqutariinnut Inatsisinillu Atuutsitsinnermut Naalakkarsuisoq)

### **Siullermeerneqarnera**

Inatsisartuni ilaasortaq Erik Jensen, Siumut, aalajangiiffigisassatut siunnersuummik matuminnga saqqummiussimmat Naalakkarsuisut qujaffigaat.

Inuiaqatigiinni hashimik aanngajaarniutinillu atuivallaarnerup kingunerisaanik Kalaallit Nunaat annertuunik ajornartorsiuteqarmat Naalakkarsuisut isumaqatigivaat. Tapersersoqatigiilluta akiorniarneqarnissaa sulissutigissavarput, soorlu imigassamik atuinerujussuaq aamma akiorniassagipput. Angajoqqaat imigassamik hashimillu atorneerluinerinik meerarpasuit naalliuuteqartarmata, aamma angajoqqaat atorneerluinerat meeqqaminnik sumiginnaalernerannik kinguneqartarmat qularutigineqassanngilaq.

Meeqqat kinguaassiutitigut atorneerlunneqartarnerat meeqqallu sumiginneqartarnerat nalinginnaasumik tamatuma peqatigisaanik inuiaqatigiinnitsinni assorujussuaq ajornartorsiutaavoq.

Innuttaasut amerlasuut atorneerluisuulersimasut meeraanermanni sumiginneqarnermik imaluunniit kinguaassiutitigut atorneerlunneqarnermik eqqugaasimasuummata tamatuma peqatigisaanik erseqqissassallugu pingaaruteqarpoq. Taamaammatt ajortut naaffeqanngitsumik ingerlalersarnerat unitsinneqartariaqarpoq unitsinneqassallunilu. Taamaattumik kinguaassiutitigut atorneerluisarnerit akiorneqarneranni aanngajaarniutinik atuinerup annertusiartuinnartup akiorneqarnera ilaavoq. Paarlattuanik hashimik pinerluuteqarnerit akiorniarnerannut ilaasumik kinguaassiutitigut atorneerluinerit akiorpagut. Pisiumasut amerliartortillugit tuniniakkat amerliartussapput.

Meeqqat inuusuttullu akornanni sumiginnaasoqartarnera atugarliortoqarneralu pitsaaliorniarlugit Naalakkarsuisut toraagalimmik suliniuteqareerput. Tamanna ilaatigut angajoqqaat meeqqanik sumiginnaasarnerat akiorniarlugu nuna tamakkerlugu Naalakkarsuisut pilersaarutaat tunuliaqutaralugu kiisalu Kalaallit Nunaanni meeqqanut inuusuttunullu suliniutit patajaallisarneqarnissaat pillugu qallunaat – kalaallillu oqartussaasoqarfiisa assigiinngitsunik suliallit akornanni suleqatigiinneq aqqutigalugu Naalakkarsuisut suliaraqarput. Tamatuma saniatigut innuttaasut peqqissuunissaat anguniarlugu suliniut Inuuneritta III Naalakkarsuisut saqqumiuteqqammerpaat, tassanilu nunatsinni meeqqat tamarmik pitsaasumik peqqissumillu inuunerminnik aallartitsinissaat ukkatarineqarpoq.

Politiit amerlanernik sulisoqartillutik suliassanik amerlanerusunik pingaarnersuisinnaanerat Naalakkarsuisut isumaqatigaat, matumani ikiaroorartunut atatillugu pinerluttuliortarnerup akiorniarneqarnissaa ilanngullugu.

Taamaammallu ukiunut arlalinnut atuuttussatut politiinut isumaqatigiissutissatut danskit naalakkersuisuisa siunniussaqaqarnermini politiit amerlineqarnissaannik siunertaqarmata nuannaarutissaavoq. Danskit politiivinut ilaasutut tamanna aamma Kalaallit Nunaanni sunniuteqartariaqarpoq. Meeqqat kinguaassiutitigut atonerlunneqartarnerat akiorniarlugu danskit kalaallillu suleqatigiinnerisa inernerisaanik, immikkut pimoorullugu suliaqartussanik politiit immikkoortortaqalissasut aamma inunnik ilisimasalinnik inuttaqartumik sulianik taamaattunik immikkut suliaqartussanik pilersitsisoqarnissaata siunniunneqarsimanera tassunga ilaavoq. Politiit ullumikkut kinguaassiutitigut atonerluinerit pillugit sulianik suliaqartartut arlallit ikiaroorartunut atatillugu pinerluuteqartarnerit pillugit sulianut suliaqarnissamut nuunneqarsinnaanissaat tamatuma kinguneraa.

Ikiaroorartunut atatillugu pinerluuteqartarnerup akiorniarnera tamakkiinerusumik isigissallugu pingaaruteqarpoq aamma kalaallit danskillu oqartussaasuisa akornanni suleqatigiinneq eqqarsaatigalugu. Taamaammat aamma immitsinnut qiviartariaqarpoq.

Kalaallit Nunaat ilanngaaserisoqarnikkut nakkutiginninnermut akisussaavoq, hashillu nunatsinnut eqqunneqarnerani tiguneqartarnissaanut sulisussat amerlanerit sulisorineqartariaqarput. Sumiiffinnilu kilisaatit umiarsuillu allat tikiffigisartagaanni nakkutiginninnerulernissaq aamma periarfissaavoq.

Periarfissaq alla tassaavoq politiit kalaallillu akileraartarnermut oqartussaasuisa akornanni suleqatigiinnerulernermik pilersitsineq, taamaaliornikkut inuit peqquserlugatik akissarsiaminnit isertitatullu nalunaarutigisaminnit aningaasaateqarnerusut, takuneqarsinnaalluurtumik umiatsianut biilinullu akisuunut akissaqarluartut nassaarineqarsinnaassammata.

Politiit pillugit aaqqissuusseqqinnerup nutaap taamatut iluseqartilluni Inatsisartuni maani saqqummiunneqartussap nunap immikkoortuini siunnersuisoqatigiinnik, politiit atuuffii pillugit apeqqutinik nalinginnaasunik eqqartuisartussanik, pilersitsisoqarnissaata kingunerissammagu naggasiutigalugu Naalakkersuisut innersuussutigissavaat. Politiit piffissami killeqartumi isumannaatsuutitsinissamik eqqissisimatitsinissamillu ataqatigiimmik aaqqissuussinissaat eqqarsaatigalugu, Nunap immikkoortuani siunnersuisoqatigiit Politidirektørimut inassuteqartarnissaat siunniunneqarpoq. Tassanilu aamma, tamanna toqqarneqassappat, hashimut aanngajaarniutinullu allanut atatillugu pinerlunnerit akiorniarnissaannut pingaartitsinerunissaq periarfissaassaaq.

Taamatut oqaaseqarlutik siunnersuut akuerineqassasoq Naalakkersuisut inassutigaat.